

**Uunga siunnersuut: Soraarnerussutisiaqalernissamut aqqissuussinermut
peqataasussaatitaaneq pillugu Inatsisartut inatsisaata allanngortinneqarnissaa pillugu
Inatsisartut inatsisaat nr. xx, xx. xxx 2020-meersoq
Aningaasaqarnermut Naalakkersuisumit saqqummiunneqartoq**

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Aningaasaqarnermut Akileraartarnermullu Ataatsimiititaliap suliarinninnermini ilaasortarai:
Inatsisartunut ilaasortaq Hermann Berthelsen, Siumut, siulittaasoq
Inatsisartunut ilaasortaq Múte B. Egede, Inuit Ataqatigiit, siulittaasup tullia
Inatsisartunut ilaasortaq Mala Høy Kúko, Siumut
Inatsisartunut ilaasortaq Aleqa Hammond, Nunatta Qitornai
Inatsisartunut ilaasortaq Malene V. Rasmussen, Demokraatit
Inatsisartunut ilaasortaq Peter Olsen, Inuit Ataqatigiit
Inatsisartunut ilaasortaq Jens Napaattoq, Partii Naleraq

UKA 2020-imi ulloq 8. oktober siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Siunnersuummi pineqarpoq soraarnerussutisiaqarnissamut aqqissuussinermut pinngitsoorani ilaanissaq pillugu Inatsisartut inatsisaata Inatsisartut 2016-imi ukiakkut ataatsimiinneranni (immikkoortoq 19) akuersissutigineqartup allanngortinneqarnera. Allanguutit arlallit, ilaatigut 2020-mi upernaakkut ataatsimiinnermi soraarnerussutisiaqalernissamut aqqissuussinermut pinngitsoorani ilaanissaq pillugu apeqquteqaat aallaavigalugu oqallinnermik (immikkoortoq 73), inatsisip aqunneqarnerani maannamut misilittagaalersunik aammalu COVID-19-ip nunarsuatsinni tuniluunnerata sunniutaanik tunngaveqartut, siunnersuutikkut ilanngunneqarput. Siunnersuutikkut pingaarnertut anguniarneqartoq suli tassaavoq kikkut tamarmik soraarninngornissaminnut sapinngisamik tapeeqataanissaat. Siunnersuut ulloq 1. januar 2021-mi atuutilissaaq.

1.1. Piffissap ileqqaarfiussap sivikillineqarnera:

Ukioq aningaasarsiaqarfiusoq innuttaasup soraarnerussutisiaqalertussatut ukioqalerfissaa ukiunik 4-nik sioqqullugu soraarnerussutisiaqalernissamut aqqissuussinermut akiliutit

unitsinneqarsinnaanerannut periarfissiisoqarpoq. Allangortitsinermit siunertaavoq innuttaasut soraarninngornissamut ukiorititat angoreeraluarlugit soraarnerussutisiaqalernissamut aaqqissuussinermit sulit akilersuisussaasut amerlassusiisa killilernissaat.

1.2. Soraarnerussutisiaqarnissamut aningaasaateqarfiit sorliit atorpeqarsinnaanerit erseqqissaatigineqarpoq

Soraarnerussutisiaqalernissamut aaqqissuussinerit soraarnerussutisianut pilersuisunit ukunaneersut inatsit malillugu kisimik atorpeqarsinnaasut erseqqissaatigineqarpoq:

- Danmarkimi imaluunniit Kalaallit Nunaanni soraarnerussutisiaqarnissamut aningaasaateqarfiit
- Danmarkimi imaluunniit Kalaallit Nunaanni inuunermit imaluunniit soraarnerussutisiaqarnissamut sillimmasiisarfiit
- Kalaallit Nunaanni aningaaseriviit

Soraarnerussutisianullit aaqqissuussinerit Norgemi, Savalimmiuni, Islandimi imaluunniit nunami EU-mut ilaasortaasumi pilersinneqarsimasut sivisunerpaamik ukiuni marlunni atorpeqarsinnaanerit akuersissutigineqarsinnaavoq. Nunani taaneqartuni akileraartarnermit ingerlatsiviup paasisutissanik pissarsiniarsinnaannginnera tunngavigalugu tamanna ukiunut marlunni killilernerqarpoq.

Nunani allani soraarnerussutisiaqalernissamut aaqqissuussinerit inatsisitigut isumaqatigiissutigullu tunngavii akileraartarnermit ingerlatsivimmit siunissami killilimmik isummerfigineqartussanngornerisigut erseqqissaaneq soraarnerussutisiaqarnissamut aningaasaateqarfimmut akiliutit aqutsivigineqarnerannut pisariillisaaqataassaaq.

1.3. Tjenestemandit ilaatinneqannginnissaat

Tjenestemandinut soraarnerussutisiaqalernissamut aaqqissuussinerup atuuttup pissusia annertussusialu pissutigalugit taakku soraarnerussutisiaqalernissamut annertunerusumik ileqqaagaqarnissamik peqquneqarnissaasa pisariaqanngitsutut nalilernerqarnera allanngummut pissutaavoq. Taamatut ilaatinneqannginnerat siunnersuummi § 2, imm. 2-mi inatsisit allasimasut tunngavigalugit tunniuttakkanut taamaallaat atuuppoq.

1.4. Ileqqaarnissamut pisussaaffeqarnerup qaffakkiartuaarnerata ukiuni 2021-mi aamma 2022-mi unitsinneqarnera.

COVID-19-ip nunarsuarmi tuniluunnerata kingunerisa annikillisinnissaat Naalakkersuisunit siunnersuutikkut anguniarneqarpoq. Ileqqaarnissamut akigititap 2021-mi aamma 2022-mi isertitanut A-nut aamma B-nut 6 %-iunnartinneratigut aamalu piffissami tassani namminersorluni suliffeqarfimmi sinneqartoorutinut akileraaruteqaataasussanut akigititap 4 %-iunnartinneratigut tamanna pissasoq siunnersuutigineqarpoq.

1.5. Aalisarnermit, Piniarnermit, aallaaniarnermit, savaateqarnermit sanalunnermillu tunisinermit soraarnerussutisiassanut akiliutissanik aalajangersaanissamut piginnaatitsissut.

Aalisarnermit, piniarnermit, aallaaniarnermit, savaateqarnermit sanalunnermillu tunisiniemi soraarnerussutisiaqalernissamut aaqqissuussinermit akiliutit pillugit nalunaarut aqutigalugu maleruagassiornissamut piginnaatinneqarnissartik Naalakkersuisut kissaatigaat.

Piginnaatitsissut taanna namminersorluni suliffeqarfimmi sinneqartoorutitut akileraaruteqaataasussanut akiliutissanit 4 %-iusunit appasinnerusumik akinik atuinissamut immikkut tunngavoq. Tamatuma pisariaqalerneranut pissutaavoq aalisarnermit, piniarnermit, aallaaniarnermit, savaateqarnermit sanalunnermillu tunisinerit tassaammata tunisisup kaaviiartigai, tassalu tassaamatik sinneqartoorutai.

Tamatuma saniatigut Naalakkersuisut isumaqarput illuatungeriit akuusut aaqqiissutinik taamaattunik pilersitsinissamik namminneq isumaqatigiissuteqarnissaat naapertuunnerpaajusoq.

1.6. Soraarnerussutisiaqalernissamut ileqqaakkanut akiliinnginnermi annikinnerpaaffissatut killiliussamik allangortitsineq

Taamatuttaaq soraarnerussutisiaqalernissamut ileqqaakkanut akiliinnginnermi annikinnerpaaffissatut killiliussap 1.000 kr.-init 2.000 kr.-inut allangortinneqarnissaa siunnersuutikkut siunertarineqarpoq. Tamatumani innuttaasut allaffissornerisa aammalu akileraartarnermut ingerlatsivimmi allaffissornerup annikillisarneqarnissaat siunertarineqarpoq. Nikingassutaasut akilersinniarneqarsinnaanerisa pisoqalisoormissaannut ulluliineq allanguutip malitsigaa. Taamaallutillu nikingassutit ukiut sisamat sinnerlugit sioqqullugu ukioq aningaasarsiaqarfiusumut tunngassuteqartut atorunnaassapput.

1.7. Siunnersuummut allanguutissatut siunnersuut

Ataatsimiititaliap suliarinninnerata nalaani Naalakkersuisut allanguutissatut siunnersuummik saqqummiussipput. Allanguutissatut siunnersuutikkut siunertarineqarpoq tjenestemandit pillugit inatsit naapertorlugu tunniuttakkat ukiumi isertitaqarfimmi 2020-mi ileqqaakkat naatsorsorneqarneranni ilanngunneqannginnissaat. Taamaallunilu siunnersuut taakkununga ukiumik isertitaqarfimmik ataatsimik kingumut tunniussivoq. Tamanna pivoq tjenestemandit soraarnerussutisiaqalernissamut aaqqissuussinerat ima annertussuseqartutut isigineqarmat soraarnerussutisiaqalernissamut annertunerusumik ileqqaarnissaq pisariaqanngitsutut isigineqarluni.

2. Siunnersuutip Inatsisartunit siullermeerneqarnera

Siunnersuutikkut allanguutit siullermeerinninnermi sukumiisumik oqaluuserineqarput. Soraarnerussutisiaqalernissamut aaqqissuussinermit peqataasussaataaneq pillugu inatsimmi pissutsit oqaluuserinninnermit ilaatinneqanngitsut siullermeerinninnermi aamma annertuumik tikinneqarput. Soraarnerussutisiaqalernissamut aaqqissuussinermit peqataasussaataaneq pillugu inatsimmi allanguutit siunnersuummi saqqummiunneqartut aammalu Inatsisartut

ataatsimiittarfianni taakku pillugit oqaluuserinninnerit isumaliutissiisummi matumani isummerfigineqarmata ataatsimiititaliamit erseqqissaatigineqassaaq.

Ileqqaarnissamut pisussaaffiup qaffakkiartuaarnerata ukiuni 2021-mi aamma 2022-mi unitsikkallarneqarnissaa Naalakkersuisut siunnersuutikkut kissaatigaat. Tamatuma kingunerissavaa piffissami pineqartumi ileqqaarnissamut akigititap isertitanut A-nut aamma B-nut 6 %-iuinnarnissaa aamalu piffissami tassani namminersorluni suliffeqarfimmi sinneqartoorutinut akileraaruteqaataasussanut akigititap 4 %-iuinnarnissaa.

Ileqqaarnissamut akigititaq annertussutsinut taakkununga ataavartumik aalajangersarneqassanersoq siunnersuummik siullermeerinninnermi oqaluuserineqarpoq. Ileqqaarnissamut inaarutaasumik akigititap 10 %-iunissaata sulisartunut pineqartunut annertuallaarnissaanik isumaqarneq oqallinnermi tassani aallaavigineqarpoq.

Naggasiullugulu soraarnerussutisiatut tunniunneqartut akileraarutaasussaansut siullermeerinninnermi nalornissutigineqarpoq.

3. Tusarniaanermut akissutit

Tusarniaanermut akissutit inatsisissatut siunnersuummut ilanngunneqarsimapput, tamannalu Inatsisartut Siulittaasoqarfiata ilusiliinermut piumasaqaataanut naapertuuppoq.

Ataatsimiititaliamilli oqaatigineqassaaq siunnersuummik piffissaq tusarniaaffiusoq sivikingaatsiarsimammat. Siunnersuut 2020-mi 3. juulimit 20. juulimut tusarniaassutigineqarsimasoq siunnersuummut nassuiaatini allassimavoq. Piffissami tassani ullut suliffiit quliupput, taamaattumillu ataatsimiititaliamit erseqqissaatigineqassaaq piffissap tusarniaaviusup sivikinnerpaamik sapaatit akunnerinik sisamanik sivilissuseqarnissaa nalinginnaasumik naatsorsuutigineqarmat. Taamaattumillu siunissami sivikinnerpaamik sapaatit akunnerini sisamani tusarniaasoqartarnissaa qulakkeeqqullugu Naalakkersuisut ataatsimiititaliamit kaammattorneqarput.

4. Apeqqutit

Ataatsimiititaliap siunnersuummik suliarinninneranut atugassaatut apeqqutit arlallit akissuteqarfigeqqullugit ataatsimiititaliap Aningaasaqarnermut Naalakkersuisoq qinnuigaa. Ataatsimiititaliap apeqqutai Naalakkersuisullu akissutaat isumaliutissiisummut ilanngussaq 1-tut ilanngunneqarput.

Assigiinngitsunik isertitaqartut soraarninngornerminni qanoq annertutigisumik matussutissinneqassanersut ataatsimiititaliap apeqqutaatigut qulaajarniarneqarpoq. Ileqqaarnissamut pisussaaffiup 4 %-iunerani matussusiinnaassuseq 8,7 %-imik qaffariassaaq.

Ileqqaarnissamut pisussaaffiup 9 %-iunerani matussusiisinnaassuseq 20 %-imik qaffariassaaq. Assigiinngitsumik isertitaqartunut matussusiisinnaassuseq ima assigiinngisitaassaaq:

- Ilanngaattissat ilanngaatiginagit 150.000 kr.-inik isertitaqarnermi matussusiisinnaasuuseq 100 %-it sinnersimassavaa.
- Ilanngaattissat ilanngaatiginagit 250.000 kr.-inik isertitaqarnermi matussusiisinnaasuuseq 64,7 %-init 76 %-inut nikerassaaq.
- Ilanngaattissat ilanngaatiginagit 500.000 kr.-inik isertitaqarnermi matussusiisinnaasuuseq 36,7 %-init 48 %-inut nikerassaaq.

Soraarnerussutisiaqalernissamut aaqqissuussinermut peqataasussaatitaaffiusumut isertitatigut killigititaq 100.00 kr.-init 150.00 kr.-inut qaffanneqarpat innuttaasut 3.700-it missaat soraarnerussutisiaqalernissamut akiliinissamut pisussaataitaassanngillat.

Soraarnerussutisiaqalernissamut aaqqissuussinermut peqataasussaatitaaffiusumut ukiutigut killigititaq 63-init 60-inut allanngortinneqarpat innuttaasut 1.600-it missaat soraarnerussutisiaqalernissamut akiliinissamut pisussaataitaassanngillat.

Siunnersuummik suliarinninnissaminut atugassaminik apeqqutit allat arlallit akissuteqarfigeqqullugit ataatsimiititaliap Aningaasaqarnermut Naalakkersuisoq qinnuigaa. Apeqqutinut taakkununga akissut ataatsimiititaliamit suli tiguneqanngilaq. Tamanna pissutigalugu siunnersuummik pingajussaaneerinninnissaq sioqqullugu siunnersuutip ataatsimiititaliamit suliarineqartussanngorlugu innersuuteqqinneqarnissaanik ataatsimiititaliap Inatsisartut qinnuigai.

5. Ataatsimiititaliap siunnersuummik suliarinninnera

5.1. Soraarnerussutisiaqalernissamut aaqqissuussinerup peqataasussaatitaaffiusup utoqqalinermilu pensionisiat sunniivigeqatigiinnerat

Utoqqalinermi pensionisiaqartitsinerup atuuttup aallarniutigalugu eqqumaffigeqquneqarnissaa ataatsimiititaliamit pissusissamisoortutut isigineqarpoq. Taamaalillunilu erseqqissarneqassaaq innuttaasut soraarninngornissamut ukiorititat angullugit suliunnaarneranni soraarnerussutisiaqalernissamut aaqqissuussineq peqataasussaatitaaffiusoq isertitaqarnissamut tunngavissatut kisimi qulakkeerinnittussaanngimmat. Utoqqalinermi pensionisiat innuttaasunit nalinginnaasunit aalajangersimasunik ukioqalersimasunit Naalagaaffeqatigiinnerullu iluani inuusimasunit pissarsiarineqarsinnaapput.

5.2. Soraarnerussutisiaqalernissamut aaqqissuussinernut akiliutinut ileqqaarnissamut pisussaaffiup qaffakkiartuaarnissaata annertussusissaa

Ileqqaarnissamut pisussaaffiup qaffakkiartuaarnerata ukiuni tulliuuttuni marlunni 4 %-imut 6 %-imullu unitsikkallarneqarnissaa Naalakkersuisut siunnersuutigaat. COVID19-ip nunarsuatsinni tuniluunnera ileqqaarnissamut pisussaaffiup qaffakkiartuaarnissaani atugassarititaasunut

allannguisimasoq Naalakkersuisut tunngavilersuutigaat. Ileqqaarnissamut pisussaaffiup 4 %-imut 6 %-imullu ataavartumik aalajangiunneqarnissaa siunnersuummik siullermeerinninnermi oqaluuserineqarpoq. Ileqqaarnissamut pisussaaffiup 10 %-iutinnissaata nunatsinni innuttaasunut annertuallaarneranik isumaqarneq ataavartunngorlugu aalajangersarneqarnissaanut tunngavilersuutigineqarpoq. Tamanna qulaajarumallugu ataatsimiititaliaq paasissutissanik arlalinnik pissarsiniarpoq Naalakkersuisunullu apeqqutinik saqqummiussilluni.

Soraarnerussutisiaqarnissamut aaqqissuussinermut pinngitsoorani ilaanissaq pillugu inatsit 2016-imi ukiakkut ataatsimiinnermi akuerineqarmat ileqqaarutissatut akip minnerpaamik 10 %-imut aalajangersarneqarneranut makku tunngaviupput:¹

- Matussutissat 75 pct.-iunissaannik anguniagaq, tassa imaappoq soraarinnngornermi aningaasarsiat pisortanit pensionisiat ilanngullugit minnerpaamik amerlassuserissavaat suliunnaarnissaq sioqqullugu sulinikkut aningaasarsiat 75 pct.-ii.
- Sinniinissaq, tassa imaappoq matussutissat 100 pct.-init amerlanerulernissaat pinngitsoortinniarneqassaaq.
- Sulinikkut aningaasarsiaqarlunilu ileqqaarneq ukiuni 25-ni ukioq naallugu suliffeqarnermut naapertuuttut
- Sulinikkut aningaasarsiat ukiumut 250.000 kr.-it
- Soraarinnngorluni inuulernermi ukiut suli inuuffissat 15-it
- Ileqqaakkat erniaat aningaasat naleerukkiartornerannik ilanngakkat 2 %-iussapput, iluanaarutinillu akileraarut 15,3 %-iussaaq

Innuttaasut soraarinnngornerminnut ikaarsaarnerminni isertitamikkut appariarujussuarnermik misigisaqaaqunagit matussutissat 75 %-iunissaannik kissaateqarneq siuliani taaneqartoq ataatsimiititaliamit immikkut maluginiarneqarpoq.

Soraarnerussutisiaqarnissamut aaqqissuussinermik pinngitsoorani ilaaffiusussamik pilersitsineq pillugu Aningaasaqarnermut Siunnersuisoqatigiit 2018-imut ukiumoortumik nalunaarutiminni ima oqaaseqarput:

”Pinngitsoorani soraarnerussutisiaqalernissamut aqqiissummik soraarnerussutisiaqarfimmik qajannaatsumik tunngavissamik pilersitsisoqarpoq pisortat soraarnerussutisariittagaannik aamma nammineq soraarnerussutisiassanut ileqqaakkanik (pinngitsoornani/suliffeqarfimmit soraarnerussutisiassat) utoqqarnut tamanut minnerpaamik inuunermi atugassaqarnermik qulakkeerinnittumik, soraarnerussutisiassat matussusiisinnaa-nissaannut qulakkeerinninnissamut (inuussutissarsiorluni isertitat soraarnerussutisianut naleqqiullugit). Akissarsialinnut pinngitsoornani soraarnerussutisianik ileqqaakkat tamakkiisumik atuutulerunik soraarnerus-

¹ Uunga siunnersuummut: Soraarnerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaat nr. xx, xx 2016-imeersumut nassuiaatit, ukiakkut ataatsimiinneq 2016, imm. 19, qup. 5-6

sutisiat matussusiisinaanerinut tunngaviusumik naammattumik pilersitsissapput.²

Soraarnerussutisiaqalernissamut aaqqissuussinerup peqataasussaataaffiusup, tassalu 10 %-imik ileqqaarnissamut pisussaaffeqarfiusup tamakkiisumik atuutilerneratigut innuttaasut soraarinnngornermini naammaginartumik inuuneqalernissaat qulakkeerneqartoq Aningaasaqarnermut Siunnersuisoqatigiit isumaqarput.

Taamatuttaaq soraarnerussutisiaqalernissamut aaqqissuussineq peqataasussaataaffiusoq pillugu § 37 naapertorlugu apeqqummut 13-2020-mut akissummi allassimavoq soraarnerussutisianut ileqqaarnissamut peqataasussaataaffiusumut minnerpaamik ileqqaarutissaq 6-8 %-imut aalajangersarneqarpat innuttaasoq soraarinnngornermini isertitamigut appariaateqassasoq aammalu pisortat aningaasaqarnerannik tatisineq annertuseriassasoq. Tamanna aningaasaqarnerup ungasissoq isigalugu attanneqarsinnaaneranut pitsaanngitsumik sunniuteqassaaq.³

Soraarnerussutisiaqalernissamut aaqqissuussinerup peqataasussaataaffiusumut minnerpaamik akigitassap allannngortinneqarnera innuttaasunut soraarinnngortunut atugassarititaasunut qanoq sunniuteqassanersoq qulaajarumallugu ataatsimiititaliaq apeqqutinik arlalinnik Naalakkersuisunut saqqummiussivoq. Taakku ilanngussaq 1-itut ilanngunneqarput. Naalakkersuisut akissutaat tunngavigalugit ataatsimiititaliaq isumaqarpoq isertitallit immikkoortut assigiinngitsut pingasut annikinnerpaaffissatut killiliussap allannngortinneqarnerannik assigiinngitsorujussuarmik sunnerneqassasut.

Innuttaasut ilanngaattissat ilanngaatiginagit 150.000 kr.-inik isertitaqartut soraarnerussutisiaqalernissamut aaqqissuussinerup peqataasussaataaffiusumut akiliuteqarnermikkut soraarinnngornermini aningaasatigut atugarisassatik pitsannngortissavaat. Inuit ilanngaattissat ilanngaatiginagit 150.000 kr.-inik isertitaqartut soraarnerussutisiaqalernissamut ileqqaagaasa tamarmiusut ilarujussuat utoqqalinermi pensionisianit matussuserneqassaaq. Taamaattumillu soraarnerussutisiaqalernissamut aaqqissuussinerup peqataasussaataaffiusumut akiliuteqarneq imminut pilersorsinnaanerup annertuseriarneranut peqataaqataassaaq. Tamanna inuiaqatigiinni aningaasaqarnermikkut naligiinnginnerup annikillineranut peqataaqataassaaq.

Innuttaasut ilanngaattissat ilanngaatiginagit 250.000 kr.-inik isertitaqartut soraarnerussutisiaqalernissamut aaqqissuussinerup peqataasussaataaffiusumut akiliuteqarnermikkut soraarinnngornermini aningaasatigut atugarisassatik pitsannngortissavaat. Taakku soraarinnngornissamut ileqqaagaat tamarmiusut matussutissatut kaammattuutigineqartut 75 %-it ataateqqasimallugit matussutissatut kaammattuutigineqartut

² Aningaasaqarnermut Siunnersuisoqatigiit, Nunatta aningaasaqarnera, 2018, qup. 31

³ § 37 naapertorlugu apeqqut, nr. 13/2020

angussavaat. Tamannalu soraarnerussutisiaqalernissamut aaqqissuussinnermut peqataasussaataaffiusumik pilersitsinermi anguniarneqartumut naapertuulluarpog.

Innuttaasut ilanngaattissat ilanngaatiginagit 500.000 kr.-inik isertitaqartut soraarnerussutisiaqalernissamut aaqqissuussinnermut peqataasussaataaffiusumut akiliutitut annikinnerpaaffissatut killiliussap 10 %-iunerani matussutissaq kissaatigineqartog angussanngilaat. Tamatumunnga pissutaavoq utoqqalinermi pensionisiat taama isertitalinnut taama annertussuseqartumik matussusiinnginnerat. Ajornartorsiut taanna isumaqatigiissutitigut namminerlu piunassutisimik ileqqaarnikkut naapertuunnerpaamik aaqqiivigineqassasoq Naalakkersuisut isumaqarput. Taama isumaqarneq ataatsimiititaliamit isumaqatigineqarpoq.

Taamaalillunilu ataatsimiititaliaq isumaqarpoq ileqqaarnissamut pisussaaffiup 10 %-imk appasinnerusumik inissinneqarnissaata ataavartumik aalajangersaaffigineqarnera sorarnerussutisianut tunngatillugu innuttaasut naligiinnginnerulernissaannut peqataaqataassasoq. Soraarnerussutisiaqalernissamut aaqqissuussineq peqataasussaataaffiusoq soraarnerussutisiassat naammaginartumik matussusiinnaanerannut tunngaviusumik annertussusiliisutut Aningaasaqarnermut Siunnersuisoqatigiit oqariartuutigisaat ataatsimiititaliamit aamma maluginiarneqarpoq.

Ileqqaarnissamut pisussaaffiup qaffakkiartornerata unitsikkallarnerarnera COVID-19-ip nunarsuatsinni tuniluunnerata kingunerisaanik pisortat aningaasaqarnerata illersorneqarnissaanut naapertuulluurtutut ataatsimiititaliamit isigineqarpoq.

5.3 Soraarnerussutisiat akileraaruteqaataassanngillat?

Soraarnerussutisiaqalernissamut aaqqissuussinnermut Kalaallit Nunaanniittunut akiliutit akileraaruteqaataannginnerat, taamaattumillu tunniunneqarneranni akileraaruteqaataasussaanerat, siunnersuummik siullermeerinnineq tunngavigalugu erseqqissassallugu pisariaqartutut ataatsimiititaliamit isigineqarpoq. Soraarnerussutisiaqalernissamut aaqqissuussinnermut Kalaallit Nunaata avataaniittunut akerlia atuuppoq, tamatumani akiliutit akileraaruserneqartarput, taamaalillunilu tunniussinnermi akileraaruteqaataaneq ajorlutik.

5.4. Inatsisissatut siunnersuutip tassungalu atatillugu nassuiaatit akornanni naapertuutinngitsoqarnera

Ataatsimiititaliap naggasiullugu eqqumaffigeqqussavaa § 1, imm. 4-mik ilanngussineq inatsimmut nassuiaatini eqqortumik ilanngunneqarsimanngimmat. Ilanngussaq taanna soraarnerussutisiaqalernissamut aaqqissuussinnermut Kalaallit Nunaata Danmarkilluunniit avataanni pilersinneqarsimasunut tunngavoq. § 1, imm. 4 nassuiaatit danskisuuini ilaavoq, nassuiaatilli kalaallisuuni ilaanani. Inatsisissatulli siunnersuummi tamanna eqqortumik ilanngunneqarsimavoq, taamaattumillu ataatsimiititaliaq annertunerusumik upaaruaatissaqanngilaq.

6. Siunnersuutip aningaasaqarnikkut kingunerisassai

Siunnersuutip piviusunngortinneqarnerata aningaasatigut kingunerisassai siunnersuummut nalinginnaasumik nassuiaatini allaaserineqarput. Tassani allassimavoq ataatsimut isigalugu pisortanut innuttaasunullu iluaqutissarsiffiussasoq, tassami ileqqaarnissamut pisussaaffiup qaffannissaata ukiuni marlunni kinguartinneqarnera akiliutinut ilanngaait ikilinerannik kinguneqartussat naatsorsuutigineqarmat, tamatumali peqatigisaanik innuttaasut aningaasaataasa tigorianaanaat amerleriartissallugit. Tamatumanili apeqqutaavoq innuttaasut ileqqaariaasertik maleruagassanut allanngortinneqartunut qanoq naleqqussarneraat. Annikinnerpaaffissatut killiliussap 1.000 kr.-init 2.000 kr.-inut qaffanneqarnera innuttaasunut iluaqutissarsiffiussatut aamma naatsorsuutigineqarpoq.

7. Ataatsimiititaliap inassuteqaatai

Pingajussaaneerinninnissaq sioqqullugu siunnersuutip innersuuteqqinneqarnissaa ataatsimiititaliamit isumaqatigiittumit qinnutigineqarpoq.

Tamanna tunngavigalugu allannguutissatut siunnersuut Naalakkersuisunit saqqummiunneqartoq (tak. Isumaliutissiisummi immikkoortoq 1.7) akuerineqassasoq ataatsimiititaliap isumaqatigiittup inassutigaa.

Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappassaaniigassanngortippaa.

Hermann Berthelsen
Siulittaasoq

Múte Bourup Egede
Siulittaasup tullia

Mala Høy Kúko

Aleqa Hammond

Malene Vahl Rasmussen

Peter Olsen

Jens Napaattoq